



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Afghanistan nungi senso ajak anir arutsü atema PM-i inyakdar

Taoba Meghalaya MLA küm 25 tepuokdak ayutsü



VOL. XVIII NO. 313 (ADOK 313) DIMAPUR YANGTEPNÜ (THURSDAY) LUROI (AUGUST) 26, 2021 ₹ 5.00

COVID- Nagaland: Anogo 5 atongtepa taneptsü angur teimba

Kohima, August 25, 2021 (TYO): Nagaland nung tanü agi anogo pungububa atongtepa COVID-19 puteter dang nungibo taneptsü angur teimba liasü.

Tanü COVID-19 puteta alir nisung 62 taneptsü angur aser 49 dak putet.

"Tesüüba ghonda 24 tsüingda COVID-19 puteta alir nisung 62 taneptsü nguogo. Parnokji Dimapur nung 37, Kohima nung 12, Mokokchung o Mon nung pungugu (5) aser Kiphire nung 3 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züingsema taneptsü angur ajak agi nisung ajak agi 27,373 kümogo aser ibaji 92.05% lir, ta pai ashi.

"Bodbarñü nisung 49 dak COVID-19 putet. Parnokji Dimapur nung 24, Mokokchung nung 11, Kohima nung 9, Longleng nung 2 Mon aser Wokha o Zunhebotong nung kaka (1) lir. Tanü tashi nung nisung 29,718 dak COVID-19 putetogo" ta Dr Kikon-isa ashi.

Tang Nagaland nung COVID-19 puteta anepalur nisung 871

lir. Tanü Peren nung COVID-19 puteta alir ka asüba züingsema tasür ajak agi 612 kümogo, ta paisa shisem.

"Tang tashi nung COVID-19 alitsü akok ta temolung melemi bilemba sample 308,422 tendangogo. RT-PCR ajanga 105,864, TrueNat ajanga 74,104 aser Rapid Antigen Test ajanga 128,454 tendang" ta Dr Kikon-isa metetdaksü.

"Mongulbar tashi nung nisung 651,431 nem COVID-19 vaccine indang dose 840,137 agütsüogo" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 60,848, healthcare workers 15,989, arishi küm 45 ser tempur 191,868 aser arishi küm 18 nungi 44 tsüingda alir 382,726 lir, ta paisa ashi.

"Vaccine agirtem rongnungi nisung 188,706-i dose anaprong agiogo. Parnokji frontline workers 43,522, healthcare workers 12,861, arishi küm 45 ser tempur 112,544 aser arishi küm 18 nungi 44 tsüingda alir 19,779 lir" ta Dr Thurr-ia metetdaksü.

Nagaland nung Covid vaccine agitsü nungnanger

Dimapur, August 25, 2021 (TYO): Nagaland nung district shia nung COVID-19 tensa repringshimtsü atema lezmükba ketdangsurtemi Covid19 vaccine agir kanga ajemba indang teblemstü lemsatep.

August 25, 2021 nü district shia nung COVID-19 tensa repringshimtsü atema lezmükba ketdangsurtemi Principal Commissioner Home, Abhijit Sinha, IAS den senden ka amandang iba osang metetdaksü.

Parnoki district sema senzüdang nisungtemi vaccine agitsü nungnangba khuret ajitetba ashi. Nübertem dang aser talisa yimtsüing nung alirtem dang

COVID vaccine indang osang tejangja prokshitsü nüngdaker ta ketdangsurtemisa ashi.

Maneni, lokti lennirtem, NGOs aser tamangba yimsü lennirtem nem tekaratiba nung iba osang sangoktsüsüla kechiyong vaccine indang osang tiyazü aser tailatem prokshiba ajanga nübertem vaccine agitsü tsübur aser nungnanger, ta ketdangsurtemisa metetdaksü.

Nagaland state sorkari COVID-19 wara tasembuba atema renemshir aser iba atema COVID tendangba, vaccine agütsüba aser healthcare infrastructure tashi itdaksüba mapa nung temolung agüja inyaker.

Eastern Nagaland MLA temi maneni Union Minister tem den ajuruteper

Dimapur, August 25, 2021 (TYO): Bodbarñü Eastern Nagaland MLA tem aser DUDA Department ketdangsurtemi New Delhi nung Ministry of DoNER, Culture & Tourism Union Minister G. Kishan Reddy den ajuruteperogo.

Senden nung Minister Pangnyu Phom-i Union Minister dang Prime Minister Narendra Modi-i Eastern Nagaland nem 'special economic package' agütsüsü sangoktsüba osang lemsatep.

Eastern Nagaland MLA temisa Union Minister Reddy dang yashi NITI Aayog CEO den ajuruteper aser DoNER Ministry nem mapatong agüja aliba indang metetdaksü.

Ministry of Home Affairs-i aniba multidisciplinary committee ajanga mapatong agütsüba agizükogo anungji Eastern

Nagaland renloktsü atema iba indang mapa inyakdaksünür ta parnokisa Union Minister dang mepishia ashi.

Union Minister Reddy-i "tekaratiba nung iba mapatong atema shilem lemsar inyaksü aser iba atema tongtipangtiba mapatem tarensen agi agüjang" ta ashi.

Paisa Prime Minister aser tanga line Ministry den asüingdangtepa inyaksü ta metetdaksü.

Tanü Eastern Nagaland MLA temi Union Minister for Law & Justice Kiren Rijiju den-a ajuruteper aser pa danga Prime Minister-i special package agütsüsü sangoktsüba osang metetdaksü.

Iba mapang Union Minister Rijiju-i DoNER Minister aser tangar den ajuruteper Ministry of DoNER ket nung agüja aliba mapatong asoshi yariteptsü nangzük.

2030 küm tashi nung Nagaland nung sensaktia agientsü

Kohima, August 25, 2021 (TYO): Nagaland nütsüing yongsük 18.88% tashi sensaktia nung alir aser state sorkari 2030 tashi nung iba khuret agientsü atema inyaker.

Nagaland nütsüing yongsük nungi 6% tashi aluyimba mapa inyaker aser 71.14% tashi yimtsüingtem nung alir.

Chief Minister Neiphiu Rio-i tawa sayaba Nagaland Sustainable Development Goal (SDG) Vision 2030 document nung sensaker nem health, education, housing aser basic services agütsüba aser sen arulen lenmang agüja Nagaland nung sensaktia agientsü indang shia lir.

Nagaland nung azüingtsü-zültsü jenjang 79.55% (2011 census) lir aser mapa manguba jenjang 21.4% lir saka national average bo 6.1% dang lir, ta

SDG Vision 2030 document nungsa shia lir.

Sensaktia ajurubaji senotsü aser banking facilities peria manguba, mapa inyakdak maliba aser food, health, education & housing magütsütetba ajanga lir ta iba document nungsa shia lir.

State sorkari rejutem, bank aser senotsü aputsürtem, NGOs, aluyimer teloktem aser lokti tentettem den yaritepa 2030 küm tatemlen tashi nung Nagaland nung sensaktia agientsü alizüing lir.

State sorkarisa Corporate Social Responsibility (CSR) funds, Externally Aided Projects (EAP), Private Public Partnership (PPP) projects, funding agencies nungi loans aser line ministry temi mapang shia sentongtem ayonga agiba ajanga rongsen lenmang bushiteptsü ta Vision document

nungsa metetdaksüogo.

Nagaland sorkarisa agricultural & allied sectors, skill development, industrial base akangshiba, Village Development Boards aser gari lenmang, IT infrastructure aser tzü tajemtsü amala basic services agütsüba ajanga sensaktia agientsü tebilemba shiogo.

Vision 2030 nung ajemdaker Nagaland Chief Minister Neiphiu Rio-i Bodbarñü sorkar department balala den senden ka menogo.

Iba senden nung Industries, Agriculture, Horticulture, Skill Development & Entrepreneurship, Bamboo Development Agency, Land Resources Development, Khadi and Village Industries Board aser Handloom and Handicraft Development Corporation department tem aden.

Advisor Neikha-i Union Sports Minister Thakur den ajuruteper

Kohima, August 25, 2021 (TYO): August 25, 2021 nü Youth Resources and Sports Advisor, Zale Neikha-i New Delhi nung Union Minister for Sports & Youth Affairs and Information & Broadcasting, Anurag Thakur den ajuruteper.

Thakur-i sports ministry mapa inyaksü lezmüktsüba atema Neikha-i tenüingsang agütsü aser Tokyo Olympics nung India-i shilem tajung agiba atema pelaba metetdaksü.

"North East region aser talisa Nagaland nung alirtemi football kanga meimer" ta paisa Union Minister dang ashi.

"Sports Ministry-i Archery, Boxing aser Wrestling dakrangloker Indira Gandhi Stadium Kohima nung Khelo India State Centre of Excellence, KISCE lapokba atema pelar. Sports Ministry lenisüba kübok Naga lanurtemi jenjang temaba atongtsü imlar" ta Advisor Neikha-isa metetdaksü.

2020 küm Nagaland atema

mapatong 5 lezmükja lir aser item rongnung Multipurpose Halls, Kohima, Medziphema, Dimapur, Wokha, Badminton Stadium, Longleng aser Astroturf Ground, Mon lir, ta paisa Union Minister Thakur dang ashi.

Advisor Neikha-isa state nung saisapongba dak sendakba mapatong tasen kar lemsatep aser Union Minister Thakur-ia Nagaland nung saisapongbaren renloktsüsü atema akokba tashi yariteptsü nangzük.

Dimapur nung shishilembartemi khuret aika ajurur: HMA

Aibelener merenshitsüla saka 'quit notice' agientsüla

Dimapur, August 25, 2021 (TYO): Hardware Merchants' Association Dimapur nung züingsema alir M/s. Mahrishi Hardware nung jenjang yanglushir ayokba maparen putetba atema süoki ia bilemer aser sasar ta Media Cell, HMA-i metetdaksü.

NSCN-IM Special Investigation Team-i Dimapur nung ochimashi maparen agientsü atema mapa inyaka aruba atema tenüingsang agütsür. Ajisüaka, iba amai ozüing alema mapa inyakba

putetba ya district administration nem osang agütsüsüla aser parnok nem tapet temerenshitsü agütsüsü nüngdak, ta HMA-i ashi.

"Dimapur nung shishilembartem dang tanen makai tax saruba aser tenla meshiba ajanga timtem kanga ajurur. Tax aser tenla meshiba indang khuret den külemi Covid wara ajanga shishilembaba nung tetsükdaksü ajurur aser tajanzük tera dang angur. Iba ama tensa ka nung shishilemba ozüing alema mapa inyaksü

aküm asütsü akok" ta HMA-isa metetdaksü.

"Ozüing alema mapa inyakba atema ozüing tapet agi merenshitsüla saka ano kasa mapang nung bangdakpurtemia kechiba iba mapa inyak ta asüba kuli bushiteptsü nüngdak. Talisa, NSCN-IM-i M/s. Mahrishi Hardware kibur nem 'quit notice' agütsüba meyipa agitsü mepishir kechiyong pai aibelenba atema iba ama temerenshi tulu agütsüsü meputep" ta Hardware Merchants' Association Dimapur-isa metetdaksü.

Teachers' Day matongdang tesayur ajak nem vaccine agütsüsüla

New Delhi, August 25, 2021 (Agencies): Tan ita state tem nem COVID-19 vaccine indang dose talila crore 2 agütsür aser iba jagi September 5 nü Teachers' Day matongdang school tesayur ajak nem vaccine agütsüsü shiogo, ta Bodbarñü Union health minister, Mansukh Mandaviya-i ashi.

"Ita shia state shia nem vaccine agütsüba sentong dak alia vaccine

dose crore 2 tema agütsüsem. Onoki state ajak dang Teachers' Day matongdang school tesayur ajak nem vaccine agütsüsü mepishio" ta Mansukh Mandaviya-i metetdaksü.

Yaküm March ita nungi novel coronavirus menatepba azüoktsü atema linük ajungalen school tem shibangtsüsa aküm.

Centre-i yaküm October nungi COVID-19 tensa apir

school tem lapoktsü temelaba agüja liasü. Iba sülen aika nung school tem terara lapok saka ano taküm COVID-19 wara tanabuba adokba sülen April ita nung school ajak shibanga liasü.

COVID-19 tensa tajungba akümba ajanga state aika nung school tem tanaben lapokdar saka school staff aser tesayurtem vaccine magiba atema teblemstü abener.

BAN aser MSME DI ajanga seminar ayongzük



Mongkum Jamir, President BAN

Dimapur, Luroi/August 25 (TYO): Business Association of Nagas (BAN) aser MSME Development Institute Dimapur, Ministry of MSME lungjemer August 24, 2021 nü Life Spring Corner, Lake View colony, Dimapur nung "MSME benefits and Schemes for BAN members" nungja agütsür seminar ka ayongzüküa liasü.

Iba seminar nung Ministry of Micro, Small and Medium Enterprises (MSME), Govt. of India indang sentong aser scheme tem awajema liasü, koba Naga entrepreneurs atema kanga tongtipang lir.

Business Association of Nagas indang tir, L Mongkum Jamir-i sentong nung jembiba mapang, 2016 küm Union

Minister for MSME ajanga Nagaland semdangba mapang BAN-i Nagaland nung MSME DI temeja ka meshia tezüluba nung agüja liasü, ta ashi.

Tanü Nagaland nung Joint Director-i anir BAN indang mangdang asangsang akumba ngua pelar, ta pai ashi.

Naga nunger entrepreneurs aser businesses temi iba maongka ya agia rongsenketsüing tali renloksüla, ta pai ashi.

Linük indang GDP shilem 29 bo MSMEs nungi lir aser bendang limai osettsüset balala bener oa ayokba shilem 48 bo MSMEs ajanga lir, ta Jamir-i ashi.

Nagaland nungi MSMEs nung shilem agiba ya tang atemabo tilaka dang alitsü akok, saka küm pongu tsüingta timba kumdaktsütsü nükla yur tang nungi inyaksüla, ta pai ayongzük.

Temelenshi ya lanurtemi ang bener arutettsü, ta pai ashi aser state nung rongsenketzüing dak sendakba sorkar maparen balala shidak inyaksü asoshi BAN-i sendaktepa aliba tentet balala den külemi inyaker, ta ashi.

Ajidang masü, Nagaland nung aliba district balala nung Naga entrepreneurs aser

businesses atema financial literacy sentongtem ayongzüküa agütsü BAN tebilemba lir, ta Jamir-isa ashi.

Sentong nung Taliwati Longchar, Joint Director, MSME Development Institute Dimapur ajanga MSME scheme balala indang PowerPoint presentation agütsü aser MSME DI Dimapur ajanga tang aliba enterprises nem nüngdakba teyari agütsütsü, ta ashi aser enterprise tasen tenzüktsü ajungshia liasü.

Selwin Samraj, Assistant Director, MSME DI Dimapur ajanga Udyam registration aser iba ajanga tajangzük anguba, SC aser ST entrepreneurs atema Government e-Marketplace (GeM) aser MSME scheme tem indang lemsatepa liasü.

Iba sentong nung Dr. Yan Murry, General Secretary BAN menden liasü aser BAN indang executive züngsem Benthungo Kithan-i tarur pela agizükba o jembi aser BAN executive züngsem Akherio Lazio-i melepzüing o jembia liasü.

Naga nunger dak entrepreneurship tanüla renlokdaktsütsü nükjidong nung BAN ya 2013 küm tenzüküa liasü aser züngsemtem tsüingta lenmang balala nung yariteper.

Tesayur nem 2021 State Awards agütsütsü tenüing sangdongogo

Dimapur, Luroi/August 25 (TYO): Directorate of School Education ajanga sangdong ka nung, tsüinglanglen tenüing agüja aliba tesayurtem ya State

Awards to Teachers, 2021 atema shimtetba alitsü, ta metetdaktsü. Tenüingtem ya merit nung ajemdaker agütsüba masü.

Maneni tarutsü nung nüngdak balala atema shimteta aliba tesayurtem den tongteprateptsü, ta sangdong ajanga ashi.

Sl. No.	Name of Teacher	Designation	Name of School
1	Shri Chabungbam Johnson Singh	Assistant Teacher	Bethesda HSS Dimapur
2	Shri Rosca T Jimo	Sr. Post Graduate Teacher	GHSS Niuland, Dimapur
3	Shri S Asangba Jamir	Sr. Graduate Teacher	GHSS Dimapur
4	Shri S Hemchandra Singh	Assistant Teacher	Greenwood School, Dimapur
5	Smt. Christina Neikhrienuo	Principal	Little Star HSS, Dimapur
6	Smt. Vilezono	Graduate Teacher	GHSS Chumukedima, Dimapur
7	Shri Sanjay Prasad	Post Graduate Teacher	GHSS Pungro, Kiphire
8	Shri Tiawapang	Post Graduate Teacher	Ruzhukhrie GHSS Kohima
9	Smt. Mimi Yhoshu	Graduate Teacher	GMS Officers Hill, Kohima
10	Smt. Purnima Kayina	Headmistress	Cherry Blossoms School, Kohima
11	Shri Nageshwar Rai	Assistant Teacher	St. Joseph School Longleng
12	Shri Dhurba Joyti Sen	Post Graduate Teacher	Queen Mary HSS, Mokochung
13	Smt. Yongkongsangla R	Assistant Teacher	Nagaland Christian Resi. School, Mkg.
14	Shri Raju Thapa	Assistant Teacher	Model School Mon
15	Shri T Manwang Konyak	Primary Teacher	GPS Yanpan, Mon
16	Shri Chichutho Kajiri	Assistant Teacher	St. Xavier HSS, Meluri, Phek
17	Shri Vevasayi Tetseo	Post Graduate Teacher	GHSS Pfutsero, Phek
18	Shri James Apong Chang	Assistant Teacher	St. John's HSS, Tuensang
19	Smt. N Chumbeni Murry	Graduate Teacher	GMS Wokha Town C, Wokha
20	Shri R Nkhyingo Kikon	Head Teacher	GMS Liphanyan, Wokha
21	Shri L Holuto Ayemi	Primary Teacher	GMS Tichipa, Zunheboto

Security Forces temi yi bena alir nisung asem apu



Dimapur, Luroi/August 25 (TYO): Security Forces temi Mon district kübok Tizit nung August 24, 2021 nü operation

ka agiba mapang nisung asemi ozüing alema yi bena aliba pua liasü.

Osang tejangja ka

angazükba nung ajemdaker mita bushiba mapang nisung asem ya apu aser parnok kabu nung sen 70,000 jenjang ozüing alema yi bena aliba nguteta liasü.

Iba ken o maneni bushisüingdangtsü asoshi pua alirtem den parnok ket nungi ngutetba yi ya Mon Police Station, Mon nem agütsüogo.

Nagaland nung yi shibelenba nokdangba atema Tizit nung aliba kaketshir aser nüburtemi Security Forces dang pelaba lemsatepa liasü.

District Hospital Dimapur nung mejangjaba nisung tasü mangka lir

Dimapur, Luroi/August 25 (TYO): Deluxe Point Dimapur anasa arishi küm 20 nungi 25 tsüingta nisung ka August 23, 2021 aonung 9:40 meta tetstüing agi senzüa lia mejangjaba gari kati arua tusker jena ao. Iba nisungba ya tekolak yirua liasü aser temang anepalutsü atema District Hospital Dimapur-i anir ao, ta osang ka ajanga ashi.



Hospital Morgue nung yua lir.

Ajisüaka iba nisungba ya temang anepalua aliba mapang iba zübu ajanga asü. Tasü mang ya PM examination aser jangjatettsü atema District

Nisungba ya half pant aser tola sentsü tanak sema liasü. Iba dak sendakba nung ken o ka benoka bushisüingdang tenzükogo, ta osang ajangasa ashi.

Nagaland Board of School Education ajanga metetdaktsür

Dimapur, Luroi/August 25 (TYO): Nagaland Board of School Education (NBSE) ya Council of Boards of School Education in India (COBSE) nung member Board ka lir, ta NBSE sangdong ka ajanga ashi.

alirtem dang NBSE-i agizükter, ta ashi.

COBSE indang member Boards/Councils kisüingta tatidang agiba indang kuli kaket tem NBSE ajanga agizükter. Aser COBSE indang member Boards/Councils nungi zünga arurtem aser Board ajanga latettsüba ama criteria abensa


Anungji COBSE indang member Board mesüra Council ajanga agiba tatidang nung takok anguba kaketshirtem dang NBSE kübok register süa aliba rejutem nung agizüktsüla, ta ashi.

Admission magidang kaketshir ya Core subjects i.e. Mathematics, Science, Social Sciences, English aser Second language ka zünga takok angu asü masü ta jangjatsüla, ta NBSE ajangasa ashi.

Ajaki meteta alitsü atema COBSE indang member Boards/Councils yamai alitsü:

1. Board of Intermediate Education, Andhra Pradesh, Vijayawada.
2. Board of Secondary Education, Andhra Pradesh, Vijayawada.
3. A.P Open School Society Government of Andhra Pradesh, Guntur.
4. Assam Higher Secondary Education Council, Guwahati.
5. Board of Secondary Education, Assam, Guwahati.
6. (a) Assam Sanskrit Board, Kahilipara, Guwahati. (b) Kumar Bhaskar Varma Sanskrit and Ancient Studies University, Nalbari, Assam.
7. State Madrasa Education Board, Assam.
8. AMU Board of Secondary & Senior Secondary Education, Aligarh.
9. Bihar School Examination Board, Patna.
10. Bihar Board of Open Schooling & Examination, Patna.
11. Bihar State Madrasa Education Board, Patna.
12. Bihar Sanskrit Shiksha Board, Patna.
13. Banasthali Vidyapith.
14. Central Board of Secondary Education, Delhi.
15. Chhatisgarh Board of Secondary Education, Raipur.
16. Chhatisgarh State Open School, Raipur.
17. Chhatisgarh Sanskrit Board, Raipur.
18. Chhatisgarh Madrasa Board, Raipur.
19. Council for the Indian School Certificate Examinations, New Delhi.
20. Dayalbagh Educational Institute (Deemed University), Agra.
21. Goa Board of Secondary and Higher Secondary Education, Goa.
22. Gujarat Secondary & Higher Secondary Education Board, Gandhinagar.
23. Board of School Education, Haryana.
24. H.P. Board of School Education, Dharamsala.
25. J & K State Board of School Education.
26. Jharkhand Academic Council, Ranchi.
27. Government of Karnataka, Dept of Pre University Education, Bangalore.
28. Karnataka Secondary Education Examination Board, Bangalore.
29. Kerala Board of Public Examination, Thiruvananthapuram.
30. Kerala Board of Higher Secondary Education, Thiruvananthapuram.
31. Board of Vocational Higher Secondary Education, Kerala.
32. Maharashtra State Board of Secondary and Higher Secondary Education, Pune.
33. Board of Secondary Education, Madhya Pradesh, Bhopal.
34. M.P. State Open School Education Board, Bhopal.
35. Maharshi Patanjali Sanskrit Sansthan, Bhopal, Madhya Pradesh.
36. Board of Secondary Education, Manipur.
37. Council of Higher Secondary Education, Manipur.
38. Meghalaya Board of School Education, Tura.
39. Mizoram Board of School Education, Aizawl.
40. Nagaland Board of School Education, Kohima.
41. National Institute of Open Schooling, Noida.
42. Council of Higher Secondary Education, Odisha, Bhubaneswar.
43. Board of Secondary Education, Odisha, Cuttack.
44. Odisha State Board of Madrasa Education, Urdu Bhawan, Bhubaneswar.
45. Punjab School Education Board, Mohali.
46. Board of Secondary Education Rajasthan.
47. Rajasthan State Open School, Jaipur.
48. Central Sanskrit University, New Delhi (Formerly Rastriya Sanskrit Sansthan).
49. State Board of Examination (Sec) & Board of Higher Secondary Examinations, Tamil Nadu.
50. Telangana State Board of Intermediate Education, Hyderabad.
51. Board of Secondary Education, Telangana State, Hyderabad.
52. Rajiv Gandhi University of Knowledge Technologies, Telangana State.
53. Telangana Open School Society, Hyderabad.
54. Tripura Board of Secondary Education, Agartala.
55. U.P. Board of High School & Intermediate Education, Allahabad.
56. U.P. Board of Secondary Sanskrit Education, Lucknow.
57. Board of School Education Uttarakhand, Nainital.
58. Uttarakhand Sanskrit Shiksha Parishad, Dehradun.
59. Uttarakhand Madrasa Education Board, Dehradun.
60. West Bengal Board of Secondary Education, Kolkata.
61. W.B. Council of Higher Secondary Education, Kolkata.
62. West Bengal Board of Madrasah Education, Kolkata.
63. The West Bengal Council of Rabindra Open Schooling, Kolkata.
64. West Bengal State Council of Technical & Vocational Education & Skill Development, Kolkata.
65. Gurukula Kangri Vishwavidyalaya Haridwar, Uttarakhand
66. Delhi Board of School Education, Govt. Sarvodaya Co-Ed Senior Secondary School, Patparganj, Delhi.

ACS ketdangsür Saibur Rahman police ket nung ayutsü Guwahati-Howrah Special Express lungpet



Saibur Rahman

Guwahati, August 25, 2021

(Agencies): Pei dak malangba rongsen bendenba atema tai tonglokja apuba Assam Civil Service (ACS) ketdangsür Saibur Rahman anogo 6 nü atema police ket nung ayutsü.

Taoba Dhubri additional deputy commissiner Saibur Rahman-ibo pa dak tai tongloktsüba ya nisung kari tasa atonger inyakba lir ta ashir.

"Ochi jungkai adoktsü" ta

Saibur-i ashi.

Pa dak malangba rongsen benden ta asüba ken o atema Chief Minister's Special Vigilance Cell, Assam-i ACS ketdangsür Saibar Rahman anema bushisingdanga aru.

Saibar-i Dhubri nung additional deputy commissioner inyak aser pai ozüing alema aser ochimashi inyakimtem ajanga rongsen jenti benden ta tai tongloktsü.

CM Vigilance Cell nung SP-i ashiba agi Saibar ket nung Rs 100 crores tema rongsen lir.

Bodbarñü Vigilance cell-i Saibar Rahman'er ki ana mita ao. Parnoki Hatigaon aser Beltola nung aliba kitem mita repring aser iba mapang Saibar kinungtsü Minakshi Rahman liasü.

Assam Assembly election 2021 nung Minakshi Rahman-i All India United Democratic Party (AIUDF) ticket amer Sarukhetri constituency nungi toktepa liasü saka lai Congress candidate Jakir Hussain Sikdar tsüngdang tamakok angu.

Arishi küm 35 tain Minakshi-i la indang affidavit nung Rs 8.5 crore rongsen aliba shia liasü.

"Saibar Rahman kinungtsüi assembly election nung AIUDF nungi toktep, saka pa sorkar mapa inyaker ka lir aser party den tesentaktep kecha mali" ta AIUDF indang General Press Secretary, Haidar Hussain Bora-i metetdaktüsüo.



Guwahati, August 25, 2021

(Agencies): Bodbarñü Assam kübok Kamrup rural district nung 02346 Guwahati-Howrah Special Express train lenman nungi lungpeter tuku.

Iba lendong ya Chaygaon railway station anasa atalok. Tanü 12:20 ako meta train ji Guwahati railway station nungi apusoa ao.

"Rangiya division kübok Guwahati-Goalpara-Bongaigaon nung tanü nikongdang 1:36 ako meta lendongji atalok" ta Northeast Frontier Railway (NFR) nung chief public relations officer (CPRO), Guneet Kaur-i ashi.

"Train nung pantry car dena takdang pezü tashi lenman nungi lungpeter tuku" ta NFR CPRO-isa ashi.

Ajisüaka, iba lendong nung nisung yiruyibongba kecha maliasü aser passenger tem tanga takdang nung mendaktsü, ta paisa ashi.

"Iba osang angashili accident relief train aser accident relief medical equipment tesem tonga ao" ta Kaur-isa shisem.

Iba tesem nung NF Railway headquarters aser Rangiya division nungi ketdangsürtem lir aser teyari agütsüdar, ta NF Railway CPRO-isa metetdaktüsü.

GOVERNMENT OF NAGALAND HOME DEPARTMENT: POLITICAL BRANCH NAGALAND: KOHIMA

NOTIFICATION

No. CON-68/1982(Pt) Dtd. Kohima, the 20th August, 2021

The Central Government, vide its Notification S. O. 3350(E) dated 28th September, 2020 declared the Nationalist Socialist Council of Nagaland (Khaplang) [NSCN(K)] along with all its factions, wings and front organizations as unlawful association under the Unlawful Activities (Prevention) Act, 1967.

As per section 4 of the Act, the matter was referred to Unlawful Activities (Prevention) Tribunal which was constituted by the Central Government vide notification S. O. 3812 (E) dated 26th October, 2020 for the purpose of adjudicating whether or not there is sufficient cause for declaring NSCN(K) as unlawful association.

The Hon'ble Tribunal gave ample opportunity of hearing to all parties including NSCN(K). However, the outfit NSCN(K) did not participate and the proceedings had to be conducted ex parte against NSCN(K). The Tribunal after examination of all facts/evidences and law on the matter, held that the outfit is involved in unlawful activities which are detrimental to the sovereignty and integrity of India and are aimed to achieve its object to secede from India and moreover, the nature of activities carried out by the said organisation, its cadres and factions leave no room for doubt that the outfit is waging war against the Government of India. Therefore, the Tribunal vide its Order dated 16th June, 2021 has confirmed the notification dated 28th September, 2020 issued by the Central Government declaring the NSCN(K) as unlawful association.

The order dated 16th June, 2021 of the Hon'ble Tribunal has been published in Gazette of India vide notification S. O. 2578(E) dated 25th June, 2021.

~ Issued by DIPR

GOVERNMENT OF NAGALAND DIRECTORATE OF SCHOOL EDUCATION NAGALAND: KOHIMA

NO. ED/EL/C/2/MON/2017-18:


Dated, Kohima the 24th August 2021

In continuation to Advertisement NO. ED/EL/C/2/MON/2017-18 Dated Kohima the 25th September 2020, and is in compliance to the Gauhati High Court, Kohima Bench Court Order Dated 07-08-2019 W.P.C 118/2019, for advertisement of 1(One) Primary Teacher post at GPS Totok Chingnyu A under SDEO Mon, the following information's are given to the candidates who applied for the same.

- There will be a written examination consisting of 80 marks for written and 20 marks Viva-Voice.
- The Syllabus for written examination shall consist of:
 - General English
 - General Knowledge
 - All subjects taught from class 1 to class V (textbooks approved for Nagaland Government Schools Only)
- Date of examination :- 10 th September 2021
Place :- Directorate of School Education, Nagaland, Kohima.
Time :- 10:00 am to 12:00 Noon(2 Hours)
- The candidates are personally asked to collect their Admit Card on 8th September 2021 during the office working hour from the Undersigned.
- Henceforth, no separate call letter will be issued to the candidates.

(SHANAVASC) IAS
Principal Director

Taoba Meghalaya MLA küm 25 tepuokdak ayutsü



Julius Dorphang (File photo)

Shillong, August 25, 2021

(Agencies): Taoba Hynñiewtrep National Liberation Council (HNLC) Chairman aser Mawhati MLA, Julius Dorphang küm 25 tashi tepuokdak ayutsü obendang agütsüo.

December 15, 2016 nü pai tanur dak tashiyim agi shi nung medemba atema aija Nongpoh nung POCSO Court indang special judge-i iba temerenshi agütsü.

Dorphong atema lawyer Kishore Gautam-i High Court tsüngdang temepishiba ka benoktsü ta osang metetdaktüsüo.

Dorphong-i arishi küm 14 tain tanur ka dak tashiyim agi shi nung medemba atema tai tonglokja 2017 küm pa MLA teinyakdak lia apu.

Pa ya POCSO Act aser Immoral Trafficking Prevention Act kübok tai tonglokja apu. 2021 nung pa medical ground nung bail nung chioktsü temelaba agütsü saka taküm August 13 nü pa tanaben apu.

Dorphang ya HNLC founder aser chairman liasü aser pai 2007 küm temai adok. Iba sülen pai 2013 küm Mawhati assembly election nungi toktepa takok angu.

Myanmar-i mozü bener aotsü meranger 3 apu

Imphal, August 25, 2021

(Agencies): Myanmar-i Covid-19 vaccines aser tanga mozütem bener aotsü merandang Manipur police-i nisung 3 apu.

Deobarnü lanur aseme gari ka nung Covishield vaccine, Remdesivir injections aser tanga mozütem Myanmar-i bener aotsü merandang apu ta police-i ashi.

National Highway-2 nung Canchipur tesem nung Singjamei police station Officer-in-Charge, Inspector

N. Jadumani Singh-i anir police telok kati mita anükdang lanur asemji apu.

Par asemji Mohammad Feroz Khan (30), Imran Khan (22) aser Shubham Kumar Anand (23) nunger ta jangjaogo.

Feroz aser Imran na ya Manipur nunger aser Shubham ya Bihar nungi lir saka tang Imphal nung alir.

Parnoki Moreh arrtsü ajanga mozütemji Moreh-i bener aotsüba liasü ta nangzükogo.



TIR YIMYIM YIMOBILEM (EDITORIAL)

DIMAPUR YANGTEPNÜ, LUROI (AUGUST) 26, 2021

Putu den asenok mapet akümer

Tanü Aadhar card aser meyongmen (thumb impression) amshiba putu ya tiyazü jembir aser ochimashirtem asoshi kanga mapet kümogo. Joko, nisungi ochishia meliteter asünungji, machine-iang nisungtem kangshia ochishia lidaktsütsü merangba putu tasen ka tenzükogo. Akhidangbo, nisungiang machine meshitakba putet saka tanü putu nungbo machine-iang ola adoka asenok tai tuteta ashir. Aji oda, taoba alima aso 20 buba tashi nung asenok tongmelang libaliro aser ochimashi jakla yimya na prongla petpeter asü, ibayongji tongmelang agi mashi ka inyaker sen angu. Ano, temulung agi agizüktettertem atemabo longa kata memeyip ser Measuring Book tiyazü amshia bill yanglur sen agizüka agili asü. Lenmang kenyongi meyanglu, ki masü aser alu mayim saka shitak yanglur aser yimer ama sen agizüka agi. Nisungbo mali saka tiyazü nisung tenung nung ita sen agizüka agibaji pei ita sen dang nungibo terben agia teimba liasü. Iba amaji tiyazü bill-sa bill yanglua agizüka agiaka, tebushir-a mali aser tapur-a mali, magir takoksa, India government-ibo sen yokpet yoker ta Naga nunger küm aika ayatzüraa memetet tiyazü nung jangratema lia aruogo. Atangji, tanüa item yimya sübaba mapatemji ajungabo meindokteti inyakdagi. Ajisüaka, mapa meinyaki sen agizüka agitsü aser nisung mali ser tiyazü ita sen yanglua agizükba mapatem inyaktsü kanga mesademi kümdagi. Joko, mapang talangka asen lima nung meshitakbajiang shitak aser shitakbajiang tai, ochishia inyakbabo lapi aser temenünüsüka saka ochimashi mapa tululu inyakbajibo akhüm taket, anungji lokti sentong tulu nung tongti tesemdang asütsü asoshi ochimashi tulu inyakba nisungang jaoka tushia amshi. Atangji, tanüa asenok iba tangatetba nungibo mepila, kechiyong asenok taginüba nükjidong ajak agi tanü angati sen teraka angur asü mangur ta asüba tangatetba aser teimla nung lokti sentong yanglur, asen kibong alir aser asen chirnurtem mesür. Aji oda, ochimashirtem nem ochishia liang ta ajungshidaktsürtemji asenok lir. Itemji nüchi asü yiar ta ashitsü? Tanüa tangarbo temeyong agi dang nemli, government nungi terenlok mapa inyaktsü atema sen croresa meyrirjang aika agizüka shitak inyakli, ano meshisema inyakli ta pei lima temenungratsüka, gari lenmangang tajungba, yimdong nung light yindong narö ama topur junga yanglur yang nung jagi tesangwa agütsüba agi yimti nung anü aia memetet, aonung dangbo anungdangang tesangwaba, mapa onsaraba agi ajak aritepa dang oli aruli jajar, yimti yimdong merükba agi yimdong nung metsüa kodangang memetsü, aluyimba yimya melenshia ayimba agi alu nungi madokner, industry tapu balala nung oset aser chiyongtsü yanglur meyanglubo inyaker. Itemji kodang asen lima den medemdangdir, akhi tejen yimya to meindok, asenokbo mezüng yokba sen agi mapa kecha meinyak, 5 percent nungi lema tenzükba 100 percent tashi lema agir, Utilization Certificate magütsütet, Delhi-i aoa majung, maoa majung ta gari lenmangtembo yakanü Mangkolemba purtemi temulunger tenla sarutepa inyakba ama, tesem ajaklen nübortemi timtem marem pei akok sarutepa inyaker, aonung pei kima memangdaktsünüba agi light bulb ka tsükloka yutsübaji asenokbo City Street light aküm ta asenok ajak Ruling kümer mangmangteper. Akhidang, center government nung Planning Commisison ajanga terenlok mapatem ajak reprangdanganger senotsü agütsüba ama, tanüa NITI Aayok ajanga dang senotsü agütsür. Ajisüaka, akhidang Planning Commission aliba mapang ama, NITI Aayok ya mapa meinyak ser tiyazü mapa inyakba kuli kaket bener arur nem tapi agi senotsü agütsüba telok ka masü. Tanüba mapa inyak meinyak ajakji NITI Aayok office nungi dena latitude aser longitude tasazük dena bushia repranger, anungji tiyazü Utilization Certificate magütsütetter. Nagaland nung sen maka timtema lira, ibaji India government ket nung sen makaba agi masü aser NITI Aayok purtemi magütsünüba agi masü saka asenok jakla aser mapa tanü putu yimya den mapet akümba ajanga lir. Joko tiyazü aser pongmang lima nung aliba putu to süiogo. Tangbo asangsang nung mapa shitak inyakertem asoshi dang sen a aser mapaa yuja lir.

OLEMSABANG

Tershilem ya kong agütsütsü

Lemtila Peter

(Yashi adok nungi...)

Jila aika nung yim yim telungjem tenzüka aser yimtsüng arogo den longjemer "Senso evangelist" mesüra "Missionary-at-large" ta tenung agütsür, arogotemi mayimjemerji parnoki tanela chiyungtsü agütsüba dang masü, tershilema sarua Arogo majangi ita sen agüja ayuba aika lir. Ano jubilee tenung nung "Putu Mission", "Clerk Mission", amala tenteta kilen shia sen saruba mission mapa inyakba ajurua arudagi. Yim fellowship aika autonomous church ama inyakyim nung aoba; fellowship kar nungbo ter shilem tashi saruba, item amala inyakyim ya Laishiba tesayuba alema ta angatetsüla. Iba amai jila nung yim yim ta tazüokba ka mali renloka ao nungbo Aor telungjem samatsü aser jila arogo nung timtem aika ajurutsü.

Mission mapaji kija, kibong mesüra telok balala tenteter arogo den angatetpa inyaktsü akok; aji nokdanga mali, saka arogo majangi ter shilem sarutena masü saka temulunger tenla bendena inyaktsüla. Ter shilem yabo Tsüngrem meyong aser arogo iba rongsenji Tsüngrem sentsüwangshidaktsütsü maparen nung ochi shia indoktsüla. Tamanger ajaki ni tenlaba ajanga arogo iba mapa tajung ya inyaker ta pela bilemetsüsa mapa ajak inyaktsüla.

Ya angatetdi: Tershilemji Tsüngrem meyong aser ibai achayangtsü Arogo nem dang nungloksü asünung Arogo majangi inyakbajibo tim masü. Kinunger, mulung ajemer longjemer sarutena sentong balala inyakba, teyari agütsüba, Missionary ayubajibo telemtetba ka janga bendener dang asünung, Tsüngrem meyong ter shilem aser teyari balala bendenbajibo benteta angatetsüla. Tamasa Tsüngrem meyong tershilem agütsür külenang tanga shilemjibo inyaktsüla.

Ter shilem asoshi Arogo teinyaktsü

* Kechiba amangba puri pei local arogo nung tershilem magütsüner? Tebilemdangtsü lir - **Amenla Mar**

* Arogo rongsenji sen masü saka amangbapur ta tenzük shiai angatetsüla. Kodang tenzükertemi tenla nung masü, saka amangbapur dak temulung agütsüdir, sen bong tzü-molu jaa atuba ama alitsü - **Zülu Jamir**

Ao arogoteem nung nüsüngtem nem tershilem indang tesayuba peria magütsür. Tershilem ya Tsüngrem meyong ta khenkhen jembiba dak alaka, kechiba agütsütsüla, kobasa agütsütsüla, ya kechi atema agütsür, tershilem aser tamang tesendaktep, ya kechiba arogo meyong, koma achayangtsüla, etc amala tesayuba agi anünga lir. Anungji item maparen meyipa reprangshitsü nungdak:

Mezüngbuba nung, Arogo toklang tenzükertemi anir, arogo nung ministry balala nung tenzük ajaki Tsüngrem meyong ter shilem Tsüngremi dangi - tetezü Khrista temang koba Arogo lir - abentsü aibelen masütsüla. Kechiaser tenzükertemi ochi shia, nendak nendaka meinyakra tanidakertemi aibelenstü.

Tanabuba nung, mapang shia Lai nungi ter shilem indang temeshi sabang nungi amangbapurtem nem tangatetba aser tesayuba shitak agütsütsüla. Arogo yinti sentep nung dang masü, saka women, youth, talisa Sunday School nunga angatetdaktsütsüla.

Tasembuba nung, arogo nung rongsen amshiyim kanga merüka amangbapur ajaki temulung alemtsüsa ketdang asütsüla, kechiaser Arogo rongsen amshiba nung nüsüng nüburtemi temulung melemtetra ter shilem agütsüba ajema kümlanglang. Iba tenzük ya anenerang ter shilem agütsütsü ta nüburi mejembitsü.

Pezübuba nung, arogo nung toklang tenzükertemi kanga nendaka, bendanga agüja meranga inyaktsüla. Santem nem tanela chiyungtsü tejanga aser shitak peria agütsütsüla. Ter shilem shitak magütsübaji Tsüngrem meyong rakzükkrakter, ya tai, yabo Tsüngrem meyong ta asüba tesayuba arokaroka sayutsüla, Arogo nung züngsem shiai kechi nungdaker ibaji meteta tenzüktsüla. Kechiaser arogo nüsüngtemji Tsüngrem arogo asoshi tashi tulutiba aser senti rongsenji lir. Nüsüngtemi angatetra rongsenji idakji lir. Tatsüba agi, arogo nung nüsüng tajung aser rongsen (Ter shilem) külemi dang aor. Arogo kar nungbo iba Sannüker, Sannükerla, Youth Pastor, etc ali tashibo ter shilem magütsütsü ta ashiba lir. Ibai toklang tenzükertem atema tebilemdangtsü koda tulu lir. Ano Arogo kar nungbo Sannüker tasenba arur tershilem mamangjai ka sashia arua Arogo nung maparen jenti renloka aor ta züngshiba lir, lbajia takoktsü masüna? Anungji tenzükerti koda bendanga agüja nüburi nungdak abensa inyaker iba dakji arogo temoatsü lir ta metetdi.

Amangbapur kija shia teinyaktsü

Tamanger ka atema Tsüngrem Oji mezüngbuba tenudangtsü lir, anungji kechisarena ajak nung Tsüngrem Oi kechi ashir aser tuyur iba amaji meinyaktetra aibelenstüsa anungji okila nung Levi 27: 30 kechisarena ajak "KIBUBA meyong lir" aser Malaki 3:10 "kü kidang chiyungtsü akatsü asoshi ter shilem ajonga terizüngdak kidangi bener arung" ta shia aliba tenoka yur iba tetuyuba nung aibelen mesüi inyaktsüla. Aseni mulungba/jangraba len tershilemji amshira Tsüngrem tsüngdang koma ka inyakaka teinyakmong makettsü. Pa tsüngdang tamagitsü süra koda tesasatsü asütsü? Temoatsü agizüktettsüsa inyakdi.

Ter Shilem shitak agütsüba jagi item ya atalokdaktsür ta angatetdi

- Tamangertem atema tamang sayutetba maparen rongnung tenlaba ya ka lir, kechiaser agütsütsübaji Tsüngrem mulungjang aser Arogo dena tamanger tajung ka ama tesendaktep tajung yuteter.
- Kechisarena ajak nung Tsüngremji mezüng aser kibur ta agizük aser tetushi akhüm ajak teyanglur Tsüngrem meyong ta nangzük.
- Teyanglur Tsüngremji Kibur ta agizük, aser aseni Tsüngrem dang meimba aser Osangtajung sangdongba nung shilem agiba atalokdaktsür.

Asen atema kangki nung Tsüngremi ozüng ajak ajangdanga temeim agi asenok alanzüktsüogo ta angateta aser agizüka tsüzüng-ozüng mesüra sentong aser nisung dak rangloker masü saka Tsüngrem temeim nung rangloker mulungbena aser pelashishia shilem agitsübaji dang asen teinyaktsülir ta sayur.

Tebilemstü aser O-tembang

Yimtsüng arogo pastor ita sen indang ya tongtipang saka salaryji pei autonomous arogo telemtetba nung lir. Takar arogo kati ita sen agütsüa ayutsübaji practical masütsü akok. Iba yabo Mungdang centralized policy ka nung ao nungdang takoktsü asütsü sudi - Tiatoshi Longkümer

Tershilem yabo Tsüngrem meyong, yabo aseni mulungba nung amshinungbo Tsüngrem indang rakzükkrakter aser iba nung aibenlen nungbo Tsüngrem nungi tasüngdangba angutsü". Telanzüba meratai agütsütettsüsa shitak inyakdi. Amangba puri tenla agütsübaji bank nung rizünga ayutsü asoshi masü, saka lemsateptsü, arok ajungtsütsü mapa inyaktsü moatsü. Anungji nungnanga masü, pei konang-naroküm bushia masü, mulungsoa temeim agi, ochi agi tenlatsü akanger aser lemsateptsü akanger. ABAM kübok arogo ajak Tsüngrem tsüngdang kasa dang. Tenyaba mapa ajak lungjemer inyaktsüla. Jila aser yimtsüng, aser arogo tulu aser tila rongsen aruba lemang keni balala. Ita sena kenyongi balala. Anungji liromedem ka nungdak aser takar arogo arogo tila shirnok menokdakteti lir parnoki mulungsoa yaritsüla. Teyaritep ajanga dang Ao arogo liromedema tejakleni aotsü. Tsüngremi tangatetba tasen agüjang ta sarasademdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan kübok Sindh nung sorkari Tenla ki ka bendoktsü



August 24, 2021 nü Pakistan kübok Karachi yimti nung sorkar ketdangsertemi St. Joseph Tenla ki benokja aliba noksa nung angur.

August 25, 2021: August 24, 2021 nü Pakistan kübok Karachi yimti nung sorkari Tenla ki ka bendoktsüogo; lokti tentet ka den külemi UN human rights mongintemi ibaji anema ola adoka liasü saka sorkari iba Tenla kiji bendoktsü.

Lawyer tem, meimchir temeden atema inyakertem, osangbenertem aser minorities atema inyakertem densema aliba Karachi Bachao Tehreek (Save Karachi Movement) teloki parnok indang twitter account ajanga sorkari St. Joseph Arogo Tenla ki bendoktsüba osang metetdaksü. Iba Arogo nungji züngsem 300 dak tema lir.

Karachi Bachao Tehreek teloki ashiba agi, Khristantemi longkak aitaka Sindh sorkar kübok anti-ecroachment squad-i Tenla kiji bendoktsü.

Karachi Bachao Tehreek nung züngsem, Abira Ashfaq-i, "Ozü linüki minorities anema yamai inyaker. Kausar Niazi nung Khristantemi asüba Tenla ki bendoktsüogo. Ya reprangdangang aser Pakistan

atema aaka bilemang! Sindh sorkar, nenoki temenok agütsütsü," ta metetdaksü.

"Sindh sorkar anema Arrla 295 benoktsüla, kechiyong parnoki tamangba yimsü ka tekülem ki raksatsüba den tamangba yimsü ka mezüngmeshiogo. Küm ana tepuokdak ayuba den senchi achitsü. Onoki nenok sepai tenüing ajak nüngdaker," ta paisa ashi.

"Onoki parnok inyakyim samatsütsü nüngdaker. Sorkar tashi, ochimashi aser sensakertem anema inyakba anentsütsü nüngdaker," ta paisa metetdaksü.

Taküm June ita nung UN nung meimchir temeden atema inyaker mongintemi Pakistan sorkar dang tzü-lenmang anasa aliba tesem nung nisung 100,000 ainshidaksüba maparen tangsa anenang, ta metetdakja liasü.

Lawyer, Mustafa Mehran-i, Gujjar Nala anasa tamalen Tenla ki anabo bendoktsüogo aser tang Khristan nütsüing aika aliba tesem nung Tenla ki bendoktsür, ta metetdaksü.

August 23 nü Karachi

Bachao Tehreek-i, sorkari Tenla ki bendoktsütsü aliba parnoki nokdangtetogo, ta metetdakja liasü, saka anogo ka dang lirbo sorkari iba Tenla ki bendoktsü.

August 23 nü Karachi Bachao Tehreek-i sangdong ka ajanga, "#SaveStJosephChurch from demolition" campaign nung shilem agiba atema ajak dang pelar. Longjiemer ola adokba ajanga tanü iba Tenla ki mebendoktsü. Ajisiüka tarutsü nungbo iba Tenla ki bendoktsütsüa akok, ta Khristantemi tsübur," ta metetdakja liasü.

Ketdangsertemi ashiba agi, 2019 küm tzümetstüing lendong atalokba nung ajemdaker court-i Karachi nung Gujjar nullah anasa ayong-no tila ana aliba tesem anasa kiojentem bendokjang, ta tuyuba nung ajemdaker parnoki Tenla ki bendoktsü, ta metetdaksü.

Gujjar nullah anasa ano ki 12,000 benoktsütsü akok, aser ibaji ajanga nisung 96,000 timtemtsü, ta UN mongintemi metetdaksü.

Pope Francis-i lendong atalokba linük asem nem teyari agütsür



August 25, 2021: Pope Francis-i menoknok lendong tulu agi kongshiba Haiti linük nung timtemertem nem US dollar 235,000 agütsütsü.

August 24, 2021 nü Vatican Dicastery for Integral Human Development-i sangdong ka ajanga, Haiti nung menoknok lendong agi kongshirtem yaritsü atema US dollar 235,000 agütsütsü, ta metetdaksü. August 14 nü menoknok magnitude 7.2 nung anokba

lendong nung nisung aika asü aser kiojen jenti raksaa liasü.

Haiti nung nisung 2,200 shi süogo aser nisung 12,000 dak tema yiruba den külemi ki 53,000 jungnüa raksago, ta ketdangsertemi metetdaksü.

Pope-i agütsüba senji menoknok agi mejungi kongshirtem nem lema agütsütsü.

Pope Francis-isa coronavirus wara agi kanga mejungi kongshia aliba linük,

Vietnam nem US dollar 120,000 agütsüogo.

Tamalen Vietnam linüki iba wara junga azüokteta liasü saka tawa ka nungi iba linük nung anogo shia nisung 10,680 tema dak coronavirus puteta arudar.

Tesüiba ita ka tsüingda Vietnam nung nisung 263,543 dak coronavirus putet aser kasa mapang nungjisa iba tashidak agi shiranger 8,296 süogo.

Pope Francis-isa taküm May shi nung Yaas cyclone agi kongshiba linük, Bangladesh nem US dollar 69,000 agütsütsü telemetba agiogo.

May 26 nü cyclone Yaas agi Bangladesh aser anüdoklen India kongshia liasü. Iba lendong ajanga Bangladesh nung nisung 20 shi asü aser nisung million 1.3 shi jenshiogo.

Bangladesh nung iba yipru mopung tesashi ajanga ki tzüiyimkümlen aliba district 9 nung 26,000 shi raksatsü aser tzü source 1,986 shi raksaja liasü.

ANO GO ABEN TSÜNGREM DEN

Kibuba tsüngsü nng jajaba

"Ni Pa dak lir ta ashibai ashir, Pai koda jajar, paia aji oda jajatsü tim." I Yohan 2:6

Ao pioneers taküm otsütem nung asen tsürabur tajungtem nungi tanü putui tangazüktsü senti senmang jenti mebushiteti samaa odaktsüba aika lir.

Par putu tensa nungji kija/kibong aser lokti tentet nung nisungi nisung nem timtem toushi agütsütepba, reshikangshi tia nung parnoki aya aser tzüra arema lenmang aisü nung alima aser nüburtem shih aser tanela nung tiptema aser anisüngzüka lidaktsütsü mechi pei ang takoksa arema maparen jenti nung taküma par tasü tait aser aser tsüngchi tamaren tsüngsütemji bushitet nungbo koda jangratemtsü aser temoatsü süla.

Asen Kibuba Yisu Khrista Pa dak amangbapurasoshi kodanga ramia (samaa) makümba tsüngsü ka toktsübaji ya, "Pai asen meimchir menen alangtsü asoshi asen nungi kecha temelen memeshii dang Pa taküm Pa taküm ajunga bendanga tenlabaji lir".

Anungji külem amangbapurtem, asen kumtetdakba Yisu Khristai renema yutsüba tanelar tsüngnep tsüngsüji pua jajar teyangja taküm ka süa anogoshia jajatsü Pa nungi angazükdi.

SARASADEM

Temeim Yisu, Nai temeim agi alima koktet nung iba temeim tsüngsü nung anogoshi jajar taküm ka ni kümdakjang ta sarasademer. Amen

Nashville nung pastor, Rev. Thomas gari lendong nung asü



August 25, 2021: Nashville, Tennessee nung Redeemer Arogo tentetsang pastor, Rev. Thomas McKenzie aser par jala, Charlie na Hombarnü (August 23) gari lendong ka nung tsükseta süogo, ta osang ka ajanga metetdaksü.

Hombar anepdang 9:50 meta iba lendongji atalok, ta Tennessee Highway Patrol-i metetdaksü.

Arrshi küm 50 pastor, Thomas-i social media ajanga par jala tena New Mexico nung aliba St. John's College-i aoer, ta lemsatepba sülen minute 30 shi dang lirbo iba lendong atalok.

"Ozü jala küna New Mexico-i aoer. Charlie St John's College, Santa Fe campus nung la mezüing küm azüngtsü atema aoer," ta pai Facebook ajanga lemsatepa liasü.

Ketdangsertemi ashiba agi, mile marker 178 nung tractor-trailer anisang jagi gari mezülongi ani tenzükbä mapang nung pastor-i aniba Nissan Versa gari jagi tractor-trailer tesülen tsükoktsü; iba lendong nungji tractor-trailer anisangbo meyirü.

Rev. Thomas McKenzie aser par jala Charlie nati pa kinüngtsü den jala, Sophie McKenzie na toktsür pilaogo. Amongnü anepdang pai twitter ajanga pa aini aotsü kanga yongyar aser pai Arogopurtem menungratsü, ta metetdakja liasü.

Pastor asüba sülen Arogoi sangdong ka ajanga Arogo züngsemtem dang pastor aser par jala na gari lendong nung asüba osang metetdaksü.

Church of the Redeemer Associate Pastor, Kenny Benge-i, "Thomas kinüngtsü Laura aser par jala Sophie na tang Nashville nung aliba kidang lir. Tang ama mangyim mapang nung Laura aser Sophie na sarasadem nung bilemtetang. Kü den staff tem aser Arogo lenirtem aoksar aser mangyimer. Iba osang angashia nenok-a jashia alitsü," ta metetdaksü.

Arogo züngsem, Susan Williams-ia Facebook post ka ajanga, pastor asüba osang angashia la melung kanga raksar, ta metetdaksü.

"Tsüngrem tsüburtem temaba nung ajungkettsü, ta shia putir Thomas-i kü nem teimla agüja liasü. Pai ochimashi anema odi-odia jemi aser Tsüngrem taochi ajanga meimchir nem tekümet agütsüba indang jembia aruogo. Pai temenen dang temenen aja aser tangar nem tatok agütsüba den taochi sayutsü onok ajungshia aru," ta laisa metetdaksü.

OLONG PAITEP # 5917

1		2				3		4		5
				6						
	7		8							
9					10			11	12	
			13		14	15				
16					17			18		
			19		20					
21		22								23
24										
							25			

TIPLÉN		LANGTSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazüng	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. _____ tatsü	- (3)
24. Tenüng kasa jatepba	- (7)	12. Tebur kidong aser zünga kasa tsüngda jatepba	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 5916 TELANGZÜBA

TIPLÉN :	LANGTSÜNGLEN :
2. Anükalem, 4. Mesak, 5. Apet,	1. Kümdang, 2. Ayak, 3. Leptep,
9. Meimtep, 11. Posü, 12. Patak,	6. Sati, 7. Yiar, 8. Sangküm, 9. Metsük,
13. Tekettsü.	10. Mazü.



ALOKBAI SENSAKER DAK RAKZUKRAKTEM:

Tulur : Hai...Alokba sorkar-i sensaker/timtemer nem angadi lema-a agüjang ta ser yokba jang ... Nai ner atema seret 5-10 jika agizuka yur-ang lemstür-a ta.... Nübur ajaki nungko-bentetja jembir ado ya...??? Ya shitak jembir asü tiyazu jembitsür...???

Alokba : Waaaaamaaaaa...!!! Ni Public Leader-a masü...Village/Colony/Ward nung GB/ Council Chairman/Member-a masünung...Ni kechi jang lemstüba jembir...!!!!???

Tulur : Hai Alokba... Na kangabo meshi-meraka tejembi... Ner Fair Price shop nung nai 'Ration Card' ajunga nung jang Seret 5-10 katizuka yur-ang lemstür-a ta jembir aja... Na aji sensaker indang chi-auso rakzuka achir ako-di.

Alokba : Ayyyyee...!!! Aji Azu-i Azu dak asanger amai dang aja...Nenok tulurtem-ia sorkari COVID-19 tashitak nokdangba mapa nung amshitsü sen lakh aika yokba meshitaki amshir-a ta public ajaki nungko-bentetja jembir ado ya...!!! Shitak amshir sernung jembir asü masü'ar onoki küla kechi metet....??? Saka jembiba ama-ji shitak inyaka lira....Nenoka aji public meyong rongsen rakzuka chitsür ako-di.

~ Lilir : L.Kika Pongener.

TANÜBO NAI LANGZÜANG

Q. Asür Kalyan Singh ya koba state nung chief minister inyaka liasü?

[A] Haryana [B] Rajasthan
[C] Uttar Pradesh [D] Madhya Pradesh

===== (Taruba adok nung onoki langzüksü) =====

YASHI ADOK TELANGZÜBA : 2019

AO OSHI ANGAZÜKDAK:
TANÜ ANGAZÜKTSÜBA OJANG



Koya
(n) kidang aser arem nung aliba takümsangnu tapu ka (rat)
* Kidang danü melira **koya** kanga apoker.

Koyimer
(adj) koba yim nungi (from which village ?)
* Na **koyimer** ta tesayuri kü dang asüngdang.

NAI-A YA METETTER MA?

SUMMER OLYMPIC ASAYAMUNG NUNG ASAYA TAPU BALA YAMAI LIR :

Artistic swimming	Archery
Diving	Athletics
Marathon swimming	Badminton
Swimming	Boxing
Water polo	Fencing
3-on-3 basketball	Field hockey
Basketball	Football
Canoe/kayak (sprint)	Golf
Canoe/kayak (slalom)	Handball
BMX freestyle	Judo
BMX racing	Modern pentathlon
Mountain biking	Rowing
Road cycling	Rugby sevens
Track cycling	Sailing
Artistic	Shooting
Rhythmic	Skateboarding
Trampoline	Sport climbing
Volleyball (beach)	Surfing
Volleyball (indoor)	Table tennis
Equestrian / Dressage	Taekwondo
Equestrian / Eventing	Tennis
Equestrian / Jumping	Triathlon
Freestyle wrestling	Weightlifting
Greco-Roman wrestling	

SUDOKU # 5958

			1	3		2					
		7		8	2			9			
1		8				5	4				
					3	7	9				
4	7	2			9		3	5			
9			5			6					
	5						1	2			
3		1	9								
2	4						7	8			

TELANGZÜBA # 5957

			7	4	3	5	8	1	9	6	2
			6	1	2	3	9	7	4	8	5
1			8	9	5	6	4	2	3	1	7
						9	3	6	7	2	5
4	7	2				1	7	8	4	3	9
9			5			2	5	4	1	6	8
	5					4	6	1	2	5	3
3		1	9			3	8	7	9	1	6
2	4					5	2	9	8	7	4

OJANG LUTEP # 5503

RANMEGA :

AKINYBA :

ERAS :

RANMEGA :

NGBAZÜA :

NGAAJA :

UTSTARÜ :

AATM :

AÜNGZNISÜK :

TSÜAGÜR :

OJANG LUTEP TELANGZÜBA # 5502

TESÜLENI MEYIPTSÜBA DAK ALAKA TEJAKLENI AOTSÜBO
KECHA TIMLATSÜ MALI KÜMADOK

TAN HOPTA ATEMA - KOMA SÜLA ?

Q. Tetsür o tetsür na aser tebur o tebur na apuani kümer aliba kibong arogo nung züngsem kümdaktsü nunga koma süla ?

Olong 20 shi nung August 27, 2021 tashi nung iba telangzuba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsüsü.



August 25, 2021 nù Mumbai nung Union Finance Minister, Nirmala Sitharaman, Additional Secretary, Department of Financial Services, Pankaj Jain (abelen), Secretary, Department of Financial Services, Finance Ministry, Debasish Panda (ajichilen nungi tanabuba) aser SBI Chairman, Dinesh Kumar Khara nungeri bank nung inyakertem den jembidang tangokba noksa nung angur.

Afghanistan nungi senso ajak anir arutsü atema PM-i inyakdar

New Delhi, Luroi/August 25 (Agencies): Union Minister of State for Defense, Ajay Bhatti, Afghansistan linük nung India nung ajak anir arutsü atema Ato kilonser, Narendra Modi-i inyakdar, ta metetdaksü.

Afghanistan nungi senso ajak anir maru tashi nisung anir aruba mission manentsü, ta Union Minister-isa metetdaksü.

Mongolbar ayaterm nunga Afghanistan nungi India nung 78 anir aruogo. IAF tayimtsü ka ajanga parnok Indira Gandhi International airport, Delhi tonga aru.

Afghanistan nungi India nung anir arutsü atema anogo shia tayimtsü anaben senzütsü atema melaogo, ta sorkar osang ajanga metetdaksü.

August 15 nù Taliban teloki Afghanistan agiba mapang nung tenzüka America aser North Atlantic Treaty Organization (NATO) sepaitemi Kabul nung aliba Hamid Karzai International Airport nung tayimtsü service achaayanga arudar.

Osangbener den jembidang Bhatti-i, "Ibaji dang masü saka onoki kidanger linük balala nungi tangartema anir arudar," ta metetdaksü.

"Tang Afghanistan tensa nung ajemdaker Citizenship Amendment Act (CAA) anema longkak aitertemi tangbo iba ozüing ya kanga tongtibang ta angatettsü. Iba ama ozüing maliba linüktem nung nisung aika samadar. Iba ozüing (CAA)

benokba atema onoki Ato kilonser nem tenüsang agütsür aser pa dang pelar," ta paisa shisem.

Maharashtra nung Union Minister, Narayan Rane apuba dak sendakba nung tasüingdangba ka langzüdang Bhatti-i, "Iba ya mang-ayangba politics lir," ta ashi.

Maharashtra Chief Minister, Uddhav Thackeray anema jembiba atema Hombarnü Ratnagiri nung Union Minister apuba sülen Mahad Police ket nung agütsü, iba sülen Magistrate Court-i pa bail nung chikogo. August 31 nù aser September 13 nù Ratnagiri police station nung asüingdangyatsü atema pa alitsüla, ta court-i tuyuogo.

India nung ano nisung 37,593 dak Covid putet aser 648 asü

New Delhi, August 25 (Agencies): India nung ano nisung 37,593 dak coronavirus putetogo aser iba tashidak agi shiranger 648 süogo, ta Bodhbarnep Union Health Ministry-i metetdaksü.

Tang tashi nung India nung nisung ajak senteper 3,25,12,366 dak coronavirus putetogo aser iba tashidak agi shiranger 4,35,758 süogo.

Tang linük nung coronavirus agi teshirangdakpur 3,22,327 (tera timba) kümogo, aser ibaji coronavirus caseload nungi shilem 0.99 dang lir.

Mongolbarnü samples 17,92,755 tendanga liasü aser tang tashi nung samples ajak senteper 51,11,84,547 tendangogo, ta ICMR-i metetdaksü.

Tang anogo shia coronavirus positive putetba shilem 2.10 lir aser hopta shia positive putetba shilem 1.92 lir, ta Union Health Ministry-isa metetdaksü.

Tang tashi nung iba tashidak agi shiranger 3,17,54,281 anepogo aser iba tashidak agi shiranger asüba shilem 1.34 dang lir.

Bodhbarnep anepdang tashi nung linük nung coronavirus vaccine dose crore 59.55 agütsüogo.

Tesüiba ghonda 24 tsüingda linük nung coronavirus agi asür 648 nungji Maharashtra nung nisung 288 asüba aser Kerala nung 173 asüba densema lir.

Tang tashi nung India nung iba tashidak agi shiranger ajak senteper 4,35,758 süogo, aser iba tashidak agi nisung timba asüba state temji Maharashtra (1,36,355), Karnataka (37,184), Tamil Nadu (34,761), Delhi (25,079), Uttar Pradesh (22,794), Kerala (19,757) aser West Bengal (18,383) state tem lir.



August 25, 2021 nù Nadia district nung Bengal State sorkari tenzükba 'Lakshmi Bhandar' Scheme atema tenüing agütsütsü asoshi tetsürtem adenshia aliba noksa nung angur.

Aluyimertemi longkak ait tenzükba sülen ita teku ajunger

New Delhi, August 25 (Agencies): Yaküm November ita tatembanglen India nung aluyimertemi aluyimba ozüing tasen asem anema longkak aitba tenzükba sülen ita teku ajunger, aser aluyimertemi September ita nunga maneni longkak sashia aitsü renemdar.

September 5 nù linük tesem ajaklen aluyimertemi 'Kisan Mahapanchayat' ayongzüka agitsü atema Muzaffarnagar (Uttar Pradesh) nung sentong renemdar.

Aluyimertem unions-i tentetba Samyukta Kisan Morcha (SKM)-i, "Onoki yimtsüngtem semdanga nùburtem nem angatetdaksütsü atema telemtetba agiogo," ta metetdaksü.

"Tarutsü nunga maneni longkak aitsü atema sentong renemtsü," ta aluyimertem lenir, Yudhvir Singh-i metetdaksü.

Bharatiya Kisan Union (BKU) general secretary-i, election agitsü aliba state tem-

Punjab, Uttar Pradesh aser Uttarakhand state tem nung BJP candidate tem meyaritsü atema onoki ajungshitsü, ajisüaka candidate kar tenüing teta yaritsü atema majungshitsü, ta metetdaksü.

Taküm West Bengal assembly election nunga aluyimertemi BJP candidate tem meyaritsü atema nùburtem ajungshia liasü.

Ano külen Brihostibar aser Hokolbar na SKM mongdang alitsü atema aluyimertem Delhi kübok Singhu Border nung adenshidar.

SKM-i sangdong ka ajanga, "Iba mongdang nung India kübok state 20 nungi nisung 1,500 shi adenshia shilem agitsü imlar," ta metetdaksü.

Anogo ananü mongdang nung industry nung inyakertem, alu nung aayangertem, yimtsüngtem nung sensakertem aser tribal nisungtemi ajangshiba tebilemstü onük balala lemsatepsü.



August 25, 2021 nù New Delhi nung aliba National Media Centre nung Union Ministers- Piyush Goyal aser Anurag Thakur nati Cabinet-i telemtetba balala agiba dak sendakba nung osangbenertem den jembidang tangokba noksa nung angur.

Punjab nung minister 4 densema MLA 30-i Amarinder anema nokdaker

Chandigarh, August 25 (Agencies): Tesüiba ita ishika Punjab nung Congress sorkar telung nung mangatettep adoka aruba sülen joko state nung assembly election agitsü ita trok shi dang lia cabinet minister pezü densema MLA 30-i yimjak nung Chief Minister, Captain Amarinder Singh anema ola adoka pa Chief Minister menden nungi agientsü takhangba agütsür.

MLA temi, taoba election nung nangzükbatem pai meinyaktetsü, iba dak alia pai Shiromani Akali Dal Tir, Sukhbir Singh Badal den külemi inyaksemer, ta aitsü.

Amritsar East nungi MLA, Navjot Singh Sidhu state Congress Tir shimba mapang nungi party nung mangatettep tamajungba aküm.

MLA 30 tenüing nung züingsem pongui akümba committee kati New Delhi nung Congress party bangdak lenirtem ajurua Amarinder CM menden nungi agientsü atema mepishitsü. Ajisüaka parnoki Amarinder melen shiba aginerar memetetdaksü.

Party nung Amarinder anema nokdakertem rongnung jails & cooperation minister Sukhjinder Singh Randhawa, technical education & industrial training minister Charanjit Singh Channi, revenue minister Sukhbinder Singh Sarkaria aser Jalandhar Cantt MLA, Pargat Singh nung densema lir.

Assembly menden 117 aliba state nung Congress MLA 80 lir aser 2019 küm July ita nung Sidhu-i minister menden nungi anenba sülen Cabinet menden kabo tazüing lir.

Minister, Bajwa-i, "Onoki Congress bangdak lenirtem den tama jembitsü, aser parnoki onoki ashiba mangara onok sasa telemtetba agitsü," ta metetdaksü.

Amarinder dak kechi tashimait ali?, ta asüingdangba langzüdang Minister, Randhawa-i, "Taktang telung nung dang mener tongbang raratsü makok mesüra tweet asüba agidang tongbang raratsü makok. Tongbangji moapu nung rarar. Anogo shia SAD aser AAP-i Bargari sacrilege ken o nung Congress aija arudar. Nùburtemi onok dang nangzükba ama meinyakba atema ashishir," ta metetdaksü.

Amarinder-i külem minister tem majurur saka Amritsar aser tanga tesemtem nung tanga sendentem nung shilem agitsü atemabo mapang agütsüteter, ta paisa aitsü.

Anüölen linüktem Afghaniستان yutsür aotsü ariteper

Kabul, Luroi/August 25 (Agencies): Anüölen linüktemi Afghaniستان nungi aritepera nisung meyrirjang aika Bodhbarnü anizüker ao, kechiaser bendanger sepaitem August 31, 2021 tashinung linük yutsür aotsü mapang atakteta aliba atonger aser linük yimsüsür tasenba, Taliban ajanga anogo atsülangtsü yimya kecha agia mesayur.

Linük nung bendanger sepaitem küm 20 shi arua aliba tatem kati arudakja Taliban teloki linük yimtiba, Kabul telungi aittsü anogo ishika lia August 14, 2021 nü nungi tenzüka United States aser par tembar linüktemi Afghaniستان nungi nisung 70,000 dak tema anizüker ogo, aser item rongnung par senso, NATO sepaitem aser Afghan nungur lendong nung alirtem dena lir.

Afghaniستان nung aliba US sepaitem lendong nung lir, ta US Tir Joe Biden-i shiogo aser teyari agütsüba telok balalai iba linük nung anüngzüka yutsüba nüburttem timtem ajurutsü, ta shia lir.

America nungur asoshi rara talangtiba tembangtsü atema taoba küm Islamist telok den züngzüktepa aliba anogo tashinung maparen ajunga tembangtsüsa inyaker, ta Biden-i ashi.

"Tekeratiba nung tembangba tajungba. Anogoshi operation agiba ajanga asen sepaitem lendongi yoker," ta Biden-i Mongulbarnü ashi.

Airport nung Islamic State ajanga takum bendanga agütsür



Afghaniستان nungi Belgium mitkar indang tayimtsü ka Melsbroek, Belgium nung aliba Melsbroek Military Airport tonga aruba sülen iba tayimtsü nungi nisungtem ayazüka aluba mapang tangokba noksa ka yangi angur.

bomb pokloksütsü akok, ta khuret tuluba akumer, ta US ketdangtsür anati tena tenüng miimshia ashi.

Nüburttem anizüker aotsü asoshi mapang tatemba ya ita tatem nung minute tatemba tashi lir, ta British foreign minister Dominic Raab-i ashi.

Taliban-i linük agiba sülen reshikangshitsü tetsübu nung Afghan nungur meyrirjang aika Kabul indang airport nung adenshi aser tia takartem tayimtsü nung menden angur.

Nisung aika airport tezülen shimdang, kong United States, Britain aser danga linüktem nungi sepaitem arua tensa azüoktsü meranger.

Parnok ya juli aser suitcase tem nung osettsüset nemtena

bener airport telungi aitsü teimla nung sepaitem dak document tem ayiploksür. Nisung ka molushi nung temokok tashi asonger tanur ka nisung ka nem amokja liasü.

"London nungi email ka ajanga America nungertemi nüburttem anizüker aor ta ni angazük, anungji nia bendang limai aotsü aru," ta nisung kati ashi.

Tangbo nüburttem iba linük yutsür jena aotsü meranger dak tenük rangloka lir, saka tanüngba nüburttem yaseta asütsü, tashidak balala agi meneptsü aser reshikangshia amshitsü jenjang nung lir, ta teyari agütsüba teloktemi ashir.

"Küm aika tsüngsarusa, rara, rongsenketsüng jenjang

mejungi akumba den COVID-19 tashidak meyokteper yipru tesashi ka arur," ta U.N. World Food Programme nung executive director, David Beasley-i Doha nungi osangbener dang ashi aser linük balala dang chiyongtsü teyari agütsütsü asoshib sen million \$200 tenlatsü ayongzüka liasü.

"Yaseta asütsüpur ya tang million 14 jungogo."

Hopta tetenzükken European Union ajanga teyari agütsüba maparen timba akumtsü sentong lir aser ali nung item chiyongtsü tongtsütsü asoshi United Nations teyari bushir, ta shia liasü.

Afghan security forces bendanga agütsürtem aser nüburttem Taliban teloki tepseter, ta osang tejangja angashiogo, ta UN human

rights tekolakbai ashi.

Taliban-ia iba ama mapa tamajung inyakba osang ya bushisüngdangtsü, ta shia lir.

Taliban teloki Afghaniستان nung 1996 nungi 2001 tashi yimsü asüba mapang sharia law tesashi benoka amshi, temeden aika agien aser tetsürtem kanga mejungi ajembanga amshi. Ajidang masü Afghaniستان nung anüölen linük anemba telungpur tesep ka liasü, aser ano maneni yamaji akumtsü akok, ta Washington, London aser dangartemi tsübua bilemer.

Linük balala nungi teyari agütsüba tentet balalai Afghan nungertem staff tem anizüker onüa lir aser kidanger linüktemi arütsü lapoktsüla, ta NATO ketdangtsür kati Kabul nungi ashi.

"Iran, Pakistan aser Tajikistan linüktemi tayimtsü mesüra ali nung aliba lenmangtem amshia nüburttem talila anizüker aotsüla," ta pai ashi.

Bendanger linük yutsür ainshiba maparen ya August 31, 2021 tashinung tembangtsüla, ta Taliban-i ashir aser United States dang sempet aliba Afghan nungertem linük yutsür aotsü ajungshiba anentsü ashi, aser ano airport nung nüburttem mesüzüktsü meranger aser parnok dang tetsübutsü kecha mali, ta ashir.

"Bendanger sepaitem lateta aliba mapang tashinung ainshitsüla. Ibaji ajanga dang civilian tayimtsütem senzütsü tenzüksü. Document tejangja aliba nüburttem August 31 sülena senzütetsü," ta Taliban odongtar Suhail Shaheen-i Twitter nung ashi.

Israel mitkari akhasang Palestine nungba süogo

Khan Younis, Luroi/August 25 (Agencies): Israel nungi Gaza sadangdak atsü atsüa aliba anasa Israel sepaitemi hopta tatemlen Palestine nungur ka dak injang agi akhaba zübu ajanga pa süogo, ta Gaza indang health ministry ajanga ashi, kong Borhbarnü longkak aittsü sentong lir.

Honibarnü rongrong adokba mapang Israel sepaitemi injang khalokja Palestine nungur ter dak tema yiru aser Palestine nungur arishi küm 32 tain Osama Khaled Deaih ya asü, ta ministry ajanga ashi.

Iba rongrong nungya Israel sepai ka kanga mejungi yirua liasü.

Tawa tzükum nung aliba Gaza nung Israel-i anogo 11 mitkar tashi amshia amakba sülen iba tesem ya tanaben yanglushitsü aser Israel nunguri tenokdangba balala agüja aliba agienang ta ajungshia arütsülen longkak aiter.

Palestine nungur ki-o-jen raksaja mapa tamajung inyakerter arütsü nung atsü atsüa alidak tapoktsü oset mereploksüba aser alema arütsü merangba mechi Israel army-i injang khaloktsü aser

dana mera agia liasü, ta Israel mitkartemi ashi.

Gaza nung yimsü asüba telok, Hamas ajanga ashiba agi, yirur alirtem rongnung arishi küm 13 tebur ka dena liasü, shiba dak tekolak nung injang agi akha.

Bodhbarnü Maan news agency ajanga osang ka sangdongba nung Hamas odongtar Abdul Latif al-Qanou-i ashiba agi, par teloki linük asoshi takum bendanga agütsür Deaih mang ayimer aser Palestine nüburttemi maneni amokbanga yimsü asütsü merangba anema nokdaker.

Israel nunguri shibanga aliba tesem nung Palestine nungur telok balalai Bodhbar nikongdang 5:00 ako (par mapang) nungi Gaza south tsütsü Khan Younis anasa arütsü nung longkak aittsü ayongzüka lir.

Tayimtsü amshia amakba mapang Hamas telok alidak tesem kar nung kongshio go ase Gaza division nung nübu tali yokshir, ta Israel mitkartemi Honibarnü shia liasü.

Mi aketba balloon kar yoka Israel south tsütsü Eshkol region nung mi adokdaksüba

sülen Israel-i Gaza nung Hombar aonung aser Mongulbarnü tayimtsü amshia maka liasü.

Ajisüaka tang tesüsa Israel-i amakba nung nisung asü-amaba osangbo mali.

Israel-i anogo 11 tanen makai Gaza nung tayimtsü amshia amakdang nisung 265 takum samatsüba tembangtsü asoshi tezüngzüktep ka yanglur ita asem lir longkak ya aiter alitsü. Iba mapang Israel nunga nisung 13 asü.

2018 küm Gaza nung aliba Palestine nungertemi longkak aitba movement ka tenzüka Israel dang tenokdangba agüja aliba tembangtsü aser Palestine nungur nem par meyong ali meyiya agütsütsü yimiyim ayima liasü, koba 1948 küm Israel kumtetba mapang tashiyim amshia aser azüdokshia agiba li alitsü.

Hopta shia longkak aitba, koba dang Great March of Return ta ajar, ibai tanem tanemi tuluba akumer, aser Israel-i Gaza nung küm ka dak tema nung injang, rubber agi meyiya aliba steel injang aser tear gas bomb agi Palestine nungi 350 shi tepsetogo.

Pfizer, AstraZeneca mozü tashi ita trok tsüngta samar: UK study

London, Luroi/August 25 (Agencies): Coronavirus tashidak nungi kumzüktsü atema Pfizer/BioNTech aser Oxford/AstraZeneca mozü dose ana agiba tashi ya ita trok tsüngta samar, anungji booster shots nungdak, ta Britain nung research agirtemi ashi.

Mozü dose tanabuba agir ita pongu nungi trok sülen Pfizer mozüi COVID-19 tashidak nungi kumzükba tashi ya shilemm 88 aliba nungi shilem 74 akumer, ta Britain indang ZOE COVID study nung data bendenba asadangba nungi sayur.

AstraZeneca mozü ya agir ita pezü nungi pongu tsüngta nung temang nung mapa inyakba (effectiveness) shilem 77 nungi 67-i alur.

Iba study ya nisung million 1.2 dak tema nung tendangba nung ajemdaker bushitetba alitsü.

Taoba mapang data asadangba nunga mozü yagi ita

trok tashi nisung ka iba tashidak nungi kumzüka ayur, ta shia liasü.

Teintet rogo aser healthcare nung inyaker atema mongpu mapang tamajungba asütsü aser iba mapang mozü agi tashidak nungi kumzüka ayuba ya shilem 50 tükepoki alur, ta ZOE COVID study nung principal investigator Tim Spector-i ashi.

"Anungji iba atema mapa kar inyaksü nungdak akumer. Asenok ajem ajema mener tashidak nungi kumzüka ayuba tashi tajemba kuma aoba aser cases tali akumba repranga malitsüla," ta Spector-i BBC television dang ashi.

Britain nung küm tatemlen COVID-19 vaccine booster campaign ka tenzüksü sentong lir, kechiaser vaccine adviser temi teintet rogo aser iba tashidak mela menatsüpur nem September ita nungi tenzüka dose tasembuba agütsüba tajungba asütsü, ta shia lir.

Advisor Imnatiba den DSC Tuensang senden amen



August 25 nü DSC senden nung Advisor Industries & Commerce, Labour & Employment, Skill Development & Entrepreneurship, Imnatiba Jamir-i ojembiba mapang tangokba noksa nung angur.

Dimapur, Luroi/August 25 (TYO): Advisor Industries & Commerce, Labour & Employment, Skill Development & Entrepreneurship, Imnatiba Jamir den Tuensang District Skill Committee senden ka August 25 nü DC conference hall nung menogo. Iba senden ya DC & Chairman DSC, Tuensang Kumar Ramnikant lenisüba nung mena liasü.

Senden nung Advisor-i,

Pradhan Mantri Kaushal Vikas Yojana (PMKVY) ya centre-i senotsü teyari agütsüba scheme ka lir aser iba ajanga unemploymen tebilemstü bentettsü ta shia iba scheme maongka agütsü nüburttem ayongzük.

Kati ka ajungshitepba den district nung ketdangsur tapet kübok ajak longjemer unemploymen tebilemstü tajemba kümdaktsütettsü, ta pai ashi.

Senden nung lenirtemi, training tembangba sülen mapa agütsüba, senotsü menor anguba, shishilembadak tapet maliba, common facility centres agi anungba, working policies dak sendakba nung sorkar agencies aser private entrepreneurs tem tsungda tesendaktep maliba aser department tem den sendaktepa maliba onüktem densema tanga onük balala benoka sensaksema liasü.

Noklak nung OPD Center lapokogo

Noklak, Luroi/August 25, 2021 (TYO): Hombarnü, Sub-Divisional Officer (Civil) Noklak, C.Phuniang-i sangdong ka ajanga, District Hospital nung takdang peria maliba aser tang ama Covid-19 tensa tamajungdang district nung health care service tsütsü sensorpitem timtem ajuruba ajiteta, DTF Noklak-i nübür (general public) atema Sub-center building, High School-B Sector Noklak nung OPD Center lapoktsütsü asoshi telemtetba agiogo, ta

metetdaksü.

SDO (C)-i, tang CHC Noklak ya COVID-19 patient aser non-covid-19 patient tem anepalutsü atema tamshidak lir. Anungji, iba wara menatapa lendongbang nungi nüburttem kümzüka yutsütsü asoshi, DTF-i Sub-center building nung OPD Center lapoktsü lemtet.

Covid-19 tashidak menatsü tsübuba ajanga, General patient temi hospital semdangba ajemogo, ta SDO (Civil)-i shisem.

Noklak district nung alir

nüburttem dang iba timtem/mepetmesü angatettsü aser medical department den amalitepa inyakba den külemi shimteta yutsüba Sub-center nung anepdang 9:00 ako nungi nikongdang 1:00 ako tashi (working days) OPD service agütsü asoshi mepishir.

Deputy Commissioner Noklak, Hiazu Meru-i, August 18, 2021 nü Sub-Center, High School- B Sector, Noklak town nung OPD Center lapoktsüogo, ta kasa sangdong ajanga metetdaksü.

Longching nung co-ordination senden ka menogo



August 23 nü Longching Village Council Hall nung senden amenba sülen senden nung shilem agirtem tangokba noksa nung angur

Dimapur, Luroi/August 25 (TYO): August 23 nü Longching yimtsüng, Longching jila, L/Hongnyu, Mohung, M/Changai, Sowa Changnyu, Sowa Changle aser EAC HQ kübok department ajak nungi staff tem tsungda co-ordination senden ka menogo. Iba senden nung 47 A/C Aboi nungi MLA Eshak Hessum aser EAC Longching na dena liasü.

Senden nung tawa shimba EAC Longching HQ, Dr. Cthitu Nienu pelaa agizüka liasü. Senden nung züngsemtemi pelashishia agizükba atema EAC kanga pelaba lemsatepba den Longching temeket nung aliba yimtsüngtem nungi lenirtem dang temzüng ozüng

shidak benoktsü aser terenlok maparen balala takok ngua benokyonga aotsü atema department balala den teka amteper inyaktsü mepeshia liasü.

Senden nung Longching Hq aser Longching Circle terenlok dak sendakba nung MLA-i onük balala benoka sensak asem aser Hq aser circle nung terenlok maparen balala atema longjemer inyaktsü telemtetba agia liasü.

Senden nung teküboklen agüja aliba onüktem benoka sensaksema liasü.

1. EAC office building maliba aser staff peria maliba.
2. Longching jila amala züngoksema maliba jilattem atema developmental

schemes kecha maliba.

3. School tasen nungdakba aser school tem nung tesayur agi anungba.
4. Anganwadi center tasen nungdakba.
5. Subcentre Longching, PHC-i ajungkettsü nungdakba.
6. Yimtsüngtem nung Sub centre tasen amenoktsü nungdakba.

Senden nung benoka sensak asemba onüktem ajak bentettsü atema takok tashi inyaktsü nangzükba den lenirtem dang nungdakba mapang nung teka amteper inyaktsü asoshi MLA-i mepeshia liasü.

Iba senden ya Longching Area Students Union tir Wangkhao lenisüba nung agia liasü.

MULUNGEN LEMSATEPER

Asür Nüngshinaro Kichu, Chungtia
ASO : 13 June 1979
ASÜ : 15 Aug 2021

Onoki teti meima aliba asür **Nüngshinaro**, la shirang yipden nung alidang nungi tasü nü tashi shirnokisa sarasadem, rongsen aser nübu agi bendang yariogo, nenok ajak dang kangasa pelaba lemsateper.

Ozüi nenok nem kecha meyipa agütsütsü maka, saka asen Teyanglur Tsüngremi nenok kija, kibong madak temoatsü süang ta ozü sarasadem.

Temeim Kinungbo, Jabaso aser Kinungertem.



OFFICE OF THE
LONGKHUM SENSO TELONGJEM
DIMAPUR : NAGALAND

TENÜNGSANG AGÜTSÜR

Longkhum Senso Telongjem Dimapur-i, **Shri. Bendangnungsang Ao - ARTS (FINE ARTS)** nem tenüngsang tetushi agütsür. Bendangnungsang Ao ya Mokochung District kübok Longkhum yimtsüng nungi lir (asür A. Anang aser asür Sutsungmongla na jabaso). Pa 1967 nungi 72 tashi Government College of Art and Craft, Calcutta nung Fine Arts azüng aser first class nung takok ngua Naga nung rongnungi mezüngbuba qualified Artist aküm. Pai 1971 küm annual Arts College exhibition, Calcutta nung shilem agi aser painting nung Ganesh Haoli award angu. Magazine 'Sword' atema Shaw Wallace Co.-i pa nem Hoogly flour mills sketches yanglutsü nongloksü aser ano Nagaland nung common Wealth Parliamentary Association headquarter's building paint asütsü nongloksü. Pa ya Governor's Award 2020 angurtem rongnung ka lir, koba Nagaland Angh-i August 15 nü Fine Arts (Painting) luyim nung takok tajung anguba aser teyari agütsüba atema agüja liasü.

Tarutsü nung takok nguyonga aotsü sarasademja atar.

Sd/-
Tsüktimeren Lkr
President

Longkhum Senso Telongjem Dimapur



Sd/-
L.F. Meren Jamir
General Secretary

SANGDONGER

Ni, Mr. S. Tsukti (Tsuknungmeren tebu), Mr. Tsuknungmeren-i kinunger adianui memeteti senotsü apumeshiba nung ni aser kinunger adianui kecha khuret mabentsü. Aser shirnokisa senotsü aser oset aputsüdir itemji tabutsür khuret dang asütsü ta metetdaksür.

Sd/-
Mr. S. Tsukti

In the Court of
Principal District & Sessions Judge
Mokokchung : Nagaland

S/C NO. 154/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late R.S. Meren has been applied by Smti. Suanungla, W/o Lt. R.S. Meren R/o H.No 56 Salangtem Ward, Mkg. Nagaland for possession of:

Family Pension, PPO No. 111815310, Closing of A/C

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 24.9.2021

Given under the hand and seal of the court on this the 24.8.2021

Sd/-
Principal District & Sessions Judge
Mokokchung: Nagaland

Arunachal nung NSCN-K (YA) züngsem ka bendanga agütsü

Dimapur, Luroi/August 25 (TYO): HQ IGAR (North) temai adoktsü atema kübok Assam Rifles Khonsa Battalion-i telungpurtem temai adokdaksütsü atema tanenmakai inyakba süngjang tanga Arunachal Pradesh, Longding District kübok Kunsia yimtsüng nung NSCN-K (YA) züngsem ka bendanga agütsüba ajanga iba tesem nung yimjung benoktsü atema inyakba mapang Assam Rifles inakyim sayur.

tesem nung aliba telungpurtem temai adoktsü atema ajungmesotsü imlar. Bendanga agütsür alisang yagi telungpur ka ama kanga timtema aliba lemsatepba den külem züngsemtem dang azütokshiba lenmang toktsütsü ayongzüka liasü. Telungpur ka bendanga agütsüba ajanga iba tesem nung yimjung benoktsü atema inyakba mapang Assam Rifles inakyim sayur.



Asüng nungi tenzüka 26-28 August tashi Solemar, Kyrgyzstan nung All Asian MMA (Mixed Martial Arts) Championship 2021 asayatsü. Aor asoshi otsü tajung kaji, tan tsüngtepba saisapong (games) nung, Ao kin nungi par asem densema, Nagalaland nungi parnok pongu lir. India linük ajonga nungi parnok tsüngteper 17 den coachtem densema ajak agi parnok 23 tashi oa lir.

Asian junior boxing nung India nunger 3 final-i iogo

Luroi/August 25, 2021 (Agencies): Dubai nung tang asayaa aliba Asian junior championships nung India nunger asayar asem-i semifinal nung takok ngua final tongtetogo.

Mongolbar aonung Rohit Chamoli (48kg) aser Bharat Joon (+81kg) na junior boys finals-i iogo aser Muskan (46kg) tetsürtem asaya final-i iogo.

Joon-i Kyrgyzstan nunger asayar Emir-Khan Razhapov 5-0 akok aser Chamoli-ia Kazakhstan nunger asayar Aidar Kadyrkhan 5-0 agi koka liasü.

Tetsür asaya nung Muskan-i unanimous decision agi

Kazakhstan tsür Yelyanur Turganova koka liasü.

Ajisüaka Supriya Rawat (66kg)-i 1-4 agi Sanowar Bozorboeva makok aser Aarzoov-a (54kg) Uzbekistan nunger asayar Guldana Tileuergen-i 2-3 agi tsükdaktsü.

Kasa mapang nung tetsür semifinal asaya tanga ka nung Devika Ghorpade (50kg) 0-5 agi Uzbekistan tsür Shaina Nematovain-i tsükdaktsü.

Teburtem semifinal asaya nung Uzbekistan nunger asayar Fazliddin Erkinboev-i 0-5 agi Ankush (66kg) akok.

Parnok pezüpronglai bronze medal ngutetogo.

Asayar draw asüba anogo

nungi India nunger asayar 20 dak temai medal angutsü jangjar liasü, kechiyong COVID-19 dak sendakba nung senzusenpong nung tenokdangba agütsür aliba ajanga linük aikati asayartem me yok mesera kar dang yok.

Iba asayamung youth category nung gold medal angurtem nem USD 6,000 agütsütsü aser silver aser bronze medal angurtem nem USD 3,000 aser USD 1,500 agütsütsü.

Maneni junior jenjang nung gold angurtem nem USD 4,000 aser silver o bronze medal angurtem nem USD 2,000 aser 1,000 agütsütsü.

Taoba India nunger Footballer O Chandrasekhar süogo

Luroi/August 25, 2021 (Agencies): Taoba India nunger football asayar aser Olympian O Chandrasekhar, shiba 1962 Asian Games nung gold medal akokba team nung densema liasü, pa Mongolbarnü par kidang süogo, ta par kinungertemi metetdaksü. Pa arishi küm 85 liasü aser pai par tanur asem toktsür süogo.

Chandrasekhar asaya aliba mapang defender ka liasü aser pa tain akümba dak sendakba nung timtem kar agi mapang tatsüka kangshia liasü, ta par kibong den sendaktepa aliba source kati PTI dang ashi. Pa Travancore-Cochin Santosh Trophy team nung züngsem ka liasü aser asayamung kar nungbo pa lenisüba nung India team asayaa liasü.

Kasa mapang nung pa 1960 Rome Olympics Indian team nung züngsem ka liasü aser 1962 Jakarta Asian Games nunga asayaogo. Pa 1958 nungi 1966 tashi India team nungi asayaa liasü. Pa Thrissur district kübok Irinjalakuda tesem nungi liasü.

Pai India tenüng nungi 25 ben tashi asayaogo aser 1959 küm Asian Cup Qualifiers nunga asayaa liasü, kong pa international jenjang nung mezüngbuba asaya. Maneni pai 1961 küm Merdeka Cup nunga asayaogo.

Domestic jenjang nung pa 1959 nungi 1965 tashi Maharashtra team nungi Santosh Trophy nung asaya aser 1963 küm iba asayamung koka liasü. Pa 1958 nungi 1966 tashi Caltex Club nungi asaya

asayaa liasü aser 1967 nungi 1972 tashi Bank of India team nungi asaya.

Pa den asükuh lemsatepba mapang AIFF tir Praful Patel-i, "Chandrasekhar asüba osang angazüka temulung koremer. Pa India team tem rongnung takok tajungtiba nguyonga aoba team nung tongtibang asayar ka liasü aser pai India nung iba asaya atema inyaktsübatem kodanga mamatoktsü. Ni pa mang ayimer," ta ashi.

AIFF general secretary Kushal Das-i ashiba agi, "Chandrasekhar-i putu aika asayartem ajungmesogo aser asayaa aliba mapang takok aika ngutetogo. Ni par kinungertem den asükuh lemsateper aser pa tanüla tesunep nung anisüngzükdakjang ta sarasademtsür."

Real Madrid-i euro million 160 agi Mbappe alitsü merang

Paris, Luori/August 25 (Agencies): Real Madrid-i Paris St Germain nungi France nunger forward Kylian Mbappe alitsü atema euro million 160 agütsütsü benokdangogo, ta Spanish aser French media sangdong balala ajanga Mongolbarnü metetdaksü.

Club anapropla nungi tang tashi nung osang kecha agüja mali.

France indang L'Equipe osang kaket ajanga ashiba agi, PSG tamendakdak masetshi lir aser Ligue 1 club ya taruba küm June ita contract metembang tashi Mbappe me yoktsü mulungteter lir.

Spain indang Marca sangdong ka ajanga ashiba agi, Real-i arishi küm 22 tain asayar ya alizüktsü atema mapang talangka nungi asadanga arudar, shibai taoba season PSG atema goal 42 idaktsü aser paia Spain nung oa asayaner ta shiogo.

As.com website sangdong ka ajanga ashiba agi, Qatar nunger takar ka me yong PSG asoshi senotsü dak sendakba nung kecha tetsükdaktsü mali

asayaa aliba ajanga Real nem tetsükdaktsü agütsür.

Britain indang Sky Sports sangdong ka ajanga ashiba agi, iba offer ya Deobarnü benoka liasü.

Mbappe ayokba ajanga PSG nem Lionel Messi indang itasen agütsüba nung mesemtsü. Argentina nunger forward aser Ballon d'Or trokben tashi koker aliba asayar Lionel Messi, iba ita tetenzükken Barcelona nungi PSG nung arua aden.

PSG puri taoba season tongtibang asayamungtem rongnung French Cup dang akok. Parnoki league nung point ka agi Lille memenep aser Champions League nunga semi-finals nung tsükadok.

Real ya tang Italy nunger coach Carlo Ancelotti-i achaayangdar aser parnok taoba season la liga nung Atletico sülen tanabuba jenjang nung tembanga liasü.

Mbappe ya 2017 küm AS Monaco nungi loan nung PSG-i arua aden aser küm ka lir teti atema tenangzüktepba ka yanglua liasü.

Serena Williams US Open nung masayatsü



Luroi/August 25, 2021 (Agencies): US Open trokben tashi koker alila Williams, June ita Wimbledon asayaba mapang yiruba sülen tang tashi khen danga asayaa mali.

Williams, temang tajungba anepalutsü atema taoba hopta Cincinnati nung asayaba Western & Southern Open nung masaya, ajisüaka la temang mapang shidak nung taneptsü mongutetba ajanga taküm Grand Slam asayamung tatembangbuba nung masayatetsüsa kümogo.

Williams-i Instagram ajanga: "temang kanga junga asadanga den kü doctor aser medical team-i tetuyuba agütsüba dak ajemdaker ni hamstring yirur aliba kanga junga anepdaksütsü atema US

Open nung shilem magitsü telemtetba agiogo," ta zülutsü.

"New York ya alima nung kanga dang jangrademtsü aketba yimti ka lir aser kü atema asayatsü tajungtiba tesem ka lir. Ni fan tem menungrar saka talang nungi dang ajak ajungmesotsü.

"Nenoki ni maneni nongita yariba aser kü dang temeim sayuba atema kanga pelar. Nenok den yakta ajuruteptsü," ta laisa ashi.

Teburtem rongnungi reigning champion Dominic Thiem, iba asayamung pezüben tashi koker alisang Rafael Nadal aser British nunger No 3 asayar Kyle Edmund nunger yiruba ajanga iba asayamung nung shilem magitsü telemtetba agiba sülen tang Williams-ia iba telemtetba agiogo.

BILEM DANGANG

"Kibok tesayuba maliba lokti tebenja agi asungtsü."